

DEPORTE



DEPORTE@AWEMAINTA.COM

Félix “Nene” Mateo

Un trayectoria di pasion na basball y softball



FÉLIX Antonio Mateo, miho conoci como “Nene” a nace na Bani, Republica Dominicana dia 20 di november 1965. Nene a cuminsa hunga baseball cu 12 año como pitcher. Rapidamente el a demostra su talento riba monticulo tirando cu velocidad halto y hopi precision.

Na 1982 destino a hib’e Venezuela unda el a sigui den baseball na Caracas. Aki el a traha su nomber como pitcher hungando p’e team di Rosales. Su capacidad pa poncha e bateadonan contrin-cante tabata impresionante. Asina el a bira e pitcher estelar di su team tirando 17 ponche den un wega y por poco a tira un wega perfecto.

Algun scout a busca Nene pero el a opta pa keda Venezuela unda el a sigui hunga su deporte stima.

Na 1991 un capitulo nobo a cuminsa den bida di Felix ora e ta muda pa Aruba. Anke el a stop di hunga baseball profesional,

pero su amor pa e deporte no a stop. Aki el a cuminsa hunga softball cu The News, despues el a hunga pa Quick Electrical, Los Amigos, Piratas y Quisquella.

Na 2023 Chago Hernandez ta acerca Nene pa e bin hunga pa Aruba Juniors. Su prome año cu Aruba Juniors e ta demostra su talento saliendo campeon honronero di Liga 50 plus. Asina e ta bira un hungado importante pa su team. E ta hunga 10 año den Liga 50 y recién e ta forma parti di e team di Aruba Juniors 60 plus. Aki tambe e ta resalta cu su velocidad y bateo. Remarcabel ta cu Nene ta un di e hungadonan cu semper ta na training riba diahuebs.

Banda di e oportunidad como deportista cu Nene a haya na Aruba Juniors e harmonia y amistad ta nifica masha hopi p’e. No ta trata di hunga so pero comparti cu personanan cu ta laga bo sinti como famia.

Na training, wega gana of perde e ta sinti e calor di hermandad cual ta haci cu su amor pa e deporte ta sigui bibo. Banda di ta un tremendo deportista Nene semper ta dispuesto pa duna un man cu trabounan na club.

Felix su historia ta un ehempel di dedicación, talento y pasion marca pa esfuerzo y amor pa e deporte. Di Bani Republica Dominicana pa Aruba el a demostra cu baseball y softball ta mas cu un deporte, e ta un forma di bida.

